

■ GLOSSA

Uss mo plaun, signur Friberg!

DA SILVIO CAMENISCH

L'obligatori in'emna L'intensiva cun tuttas scolas sin pista? Betg temp. Fa endament l'emna da missiun catolica sfurzada pli baud mo ussa sin pista, quella propaganda quasi dictat da turisticchers e socis, sche ti dumondas mai.

Tgi, signur Friberg, gea, Vus essas mane giads, fa per l'amur da Dieu tut quai ch'ins spetga ozendi da las scolas? Fan quai ils deputads, turisticchers, intendants, banchiers, hoteliers, quels insatge meglier da schlingias e guants che sa laschan ir bain a l'apero da Bumaun? Survegnì daguts da naiv u tgenins en voss rosolis e vin alvs? Uss sa vilenta la magistraglia fitg! Tegna enavos ils attestats! Quella ha fin culiez da far la servienta a e da tuts!

Tgi prenda tras cun els e cura insumma il duair pli elementar rudimentar? Cura che tuts vulan insatge da las scolas? Tgi mussa a quels noss s. linguatg d'idioms e latiers linguatgs dal fauss cumpromiss?

Tgi prenda tras cun els noss vegl restampà e renovà «Sigisbert en Rezia» e tgi mussa ils roms relevants interessants per top managers? La ritguna miliardaria Zachanassian ed aug Wieland.

Tgi lascha ir els, sto laschar, amez las lecziuns tar il dr. psichiater, psicolog, ortopedia, lo-



gopedia, biblioteca e polizia? Tgi dat els structuras dal di, da la notg e da dumengia en damaun (l'obligatori vegn) che la mamma cun ils dus babs, resp. il bab cun las duas mammas dorman or, suenter van a dar golf? Dat il signur Friberg sez er golf? Super.

Tgi schubregia cun els las cuntradas da tut rufid bittà? Fan quai quels ch'han applaudi cun ovaziuns a l'obligatori «emna sin pista per tuts» u fa quai ina giada dapli, gist, la magistraglia!

Tgi fa cun els emnas da nutriment, tgi emnas da raiver, parc da sugas, nudar zambregiar chaltschiel per il cudesch da records?

Etgi fa emnas da musica, tgi studegia en e chanta la damaun per cumenzar e la saira per finir l'imni naziunal, per cumplaschair da populistas naziunalists? L'obligatori vegn a vegnir, sche ti dumondas mai.

Tgi fa cun els projects e projects tants ch'i vegnan da qua siador e da qua or!

Etgi dat pled e fatg a noss inspecturat che vegn in corpore ad evaluar: mintgin cun ura da stop e da hop sin isch! Tegnair en il temp, collega! Temp è daners. Mintga rap quinta pli tard en l'industria e hotellaria? E bella cultura. Betg il «Lazarus Occupy»! Lez è maltgiert!

Tgi paja tut quai a las scolas, fa quai il chantun? Famiglias da migraziun cun bursas vidas. Faschain nus ina chadaina da fortuna da «mintga rap dumbra!» per curclar tuts custs sin pista e sper pista? Restaurant, kino, bar, kiosk, butia, bischutaria, drogaria, condomaria, quai ch'il temp e la ferma moda diceschan. La magistraglia na dicescha betg pli, a lezza vegni dictà!

Tge, sche nus na cuntranschain betg ils standarts, signurs turisticchers e cusseglers quai e tschai? E tge, sche magistraters sa tschentan en la clinica da malsaus da la gnerva, pateschan la notg da mancanza da flad, l'apnoe, «Atemlos durch die Nacht» e dorman pli cun l'apparatura che cun l'um u la dunna: ch'i fiss obligà, sche ti dumondas mai.

Vegni lantschà ina «umsetzungsiniziativa» per l'obligatorium emna sin pista per tuts, signur Friberg? Grazia ch'i dat Vus.